

四庫全書

集部

欽定四庫全書

西溪集卷五

宋 沈遘 撰

試大理評事前保信軍節推鄭煜可大理寺丞試
祕校前冀州衡水縣令丁鐔可著作佐郎

勅某等朝廷久安而仕者益衆多故吏部之法益密而
嚴蓋官人之慎不如是則濫而有能應其法以得進者
豈非良吏哉惟爾煜暨鐔閱効實皆最無殿是用臨
閱於廷並擢於王官廷尉東觀之屬往服於位靖共夙

夜思有攸立無累我明可

文思使李樞可康州刺史

勅某南方多事羣蠻屢擾吏民不得休息朕甚憂之故
使靖守廣又思得忠勇材智之將以佐其軍惟爾樞前
日在廣能捍不虞之寇以全其城其效已試然則熟知
樞賢其以樞領刺史之符往護一道之兵以為靖貳矧
靖嘗請爾以自輔其必能協心均力以紓朕南顧之憂
矣往惟祗服可

文思使郝元規可右騏驎使

勅某荊州北部外撫夷粵而武陵之要用武之地也治民禦侮益難其人而大臣方薦爾元規之材故朕以爾往領郡事又躡升使列數等以重其行朕惟是大臣之信故褒用及爾其勉思所以自効者稱爾所知對我明命可

奏舉人前太原府大谷縣令王可久奏舉人前權知嘉州軍事推官趙嗣宗可並大理寺丞

勅某等吏部選法密矣然用以進退州縣之吏尚或失之豈非難哉今爾等閥閱之狀既應其法朕又躬辨於前然後進爾於廷尉之屬王官之列其徃思服凡爾之奔走於役者幾歲於茲矣得之之艱未若守之之艱也如何其勿怠可

都官郎中楊佐可司封郎中

勅某水之為利害也甚矣堯舜其猶病諸故歷代建以為官莫之能廢而朕用稽焉惟爾佐學行才智廉正膚

敏實吾士大夫之望而自領都水出入累歲夙夜盡瘁
具有厥功朕甚嘉之故因有司大比之序陟爾左曹之
正以為朕寵其往宿爾業愈獻厥成則亦當有以稱爾
矣欽哉可

光祿寺丞韓宗道可著作佐郎

勅某夫士大夫能世其家而保其祿位者固可稱矣况
又能自奮其名以致其身者可不尚之以爾名臣之後
克篤學問以第俊造之選故今考三歲之典擢爾於東

觀之屬以顯爾能且使在位之家有以知勸爾亦愈思
殿服可

東頭供奉官趙鼎邢几可並內殿崇班

勅某等有司言爾積勞計日咸應於法而當遷故朕進
爾班於殿中從朝者之後夫由奔走之冗而至此者艱
矣爾其往服毋怠而舊愈自刻厲庶幾有以稱我之寵
榮也可

漳州錄事參軍前監郢州京山縣酒稅申房可太

子洗馬致仕

勅某夫壯而宣其力老而休其身仕者之美也故古者
皆欲褒顯之以風在位然則雖爾州縣之卑豈可遺乎
其以房為東宮之屬通籍於朝勉哉初終以稱吾意可
宣徽北院使鎮寧軍節度使判鄆州充京東西路
安撫使曹佺奏小方脉鑿人李整

勅某夫醫之於人不可須臾而無者也矧吾大臣而有
請於爾醫者其可勿許申按故事試以一命以為吾大

臣之恩焉可

大理評事馬直溫可衛尉寺丞

勅某夫善積者身尊勞大者報豐皆有稱也今爾累日
考成則得遷一官使能奮然有以自出於衆則吾豈不
能不次而待爾乎其往思効可

東頭供奉官唐贊許才良可並內殿崇班

勅某等考績黜陟之法朝廷之大信一均於爾臣工豈
以貴賤而有間哉贊等籍於三班其已久矣功狀無殿

是應於法故遷之叙於殿朝之列顧爾之舊可謂光寵其往自勵尚克稱之可

龍圖閣直學士左司郎中知河陽李允可左諫議大夫依前充龍圖閣直學士餘如故

勅左右侍從之職股肱藩宣之寄中外之選兩莫重焉然効大者必遲故考之至乎四歲禮優者必異故進之加乎二等有國之典也具官某脩潔無玷亮直有守入備言責出殿方面風采之美足稱一時故今申按於故

陟爾以正諫大夫且仍延閣之舊以臨盟津之奧爾其
祇服有以善其官而稱我之意無忽可

大理評事蔣續可衛尉寺丞

勅某吳大縣也號為難治今汝為令藹然有聲惟汝名
臣之後能濟其美吾甚嘉之而有司方以大比之書來
上故陟汝於司衛汝其懋哉吾尚有以褒汝者且無
愛焉爾可

內殿崇班李光嗣可內殿承制

勅某夫有內朝之籍以護一州之兵武吏亦顯矣其可不勉今又以考課法增爾秩一等爾將曷以稱我之寵歟其夙夜乃事思有所立豈特無蹈於咎悔而已可

衛尉寺丞薛昌裔楊仲安可並大理寺丞

勅某等夫行遠必自邇登高必自卑君子之道也仕者亦猶是爾今汝等能積其勞三歲故進其秩一等使積而不已則其進也將無所不至亦在懋之而已其往無怠可

西京左藏庫副使楊文廣可供備庫使

勅某前日南夷負恩為亂以覆壞我郡邑至於用師而後定雖朕不德不能懷服方外而亦將吏不戒不習之罪也故深察往失而推擇所遣益不敢輕惟爾文廣材武忠勇更事有勞故今以爾總一道之兵戍於邕管又陞爾於諸使之正以重其行爾其祇聽朕命戒疆事習軍計使南徼無警言而朕為知人則時乃之功矣其往欽哉可

職方員外郎蕭映可屯田郎中太子中舍路諫可

殿中丞

勅某等夫臣能奉職以効於上上能念功以報於下則萬事其有隳而百工其有惰哉然則爵賞雖貴不得而吝也今吾按有司之奏各進爾等秩一等其往祇服益思所以善其職而取報之寵者亦惟休哉可

內殿崇班丁政可內殿承制

勅某海旁諸郡夷蠻雜處奪攘侵害無時無之然則持

兵徼候之吏不可以不報其勞也以爾居職三歲無有敗事部使言狀應以褒陟故遷爾一等以信賞法以勸武功可

陝府西路都轉運使兵部郎中充天章閣待制彭思永可右諫議大夫依前充天章閣待制充高陽關路都部署兼安撫使知瀛州

勅河北四方之重而高陽又河北之衝也內蓄勁兵外抗強虜則帥守之任豈輕哉具官某資賦純茂才聞優

給更佐臺省參列侍從風采之美簡在朕心故陟爾以
諫臣之長仍廷閣之舊以臨於瀛爾其往服厥事思所
以息民備敵之宜以揚爾能以稱朕意可

淮南等路都大發運使守少府監孫長卿可右諫
議大夫充陝府西路諸州水陸計度都轉運使
兼本路營田勸農使

勅秦地千里古之建國莫強焉今雖郡縣然猶建之五
府宿重兵以制西戎則天下之重也其將命刺舉益難

其人具官某行義甚修風力甚壯內佐大農京兆之會
外領平刑漕食之劇勤勞不急厥功粲然其以某秩諫
大夫臨使西道爾其宣我威澤足我儲峙使疆事無警
而百姓有裕時汝之能其往祇服可

大理寺丞闕溫仁公孫迪可並太子中舍著作佐
郎趙庾可祕書丞太常寺奉禮郎張鼎可大
理評事

勅某等古人有言奉職循理亦可以為治故審官之法

以責士大夫者如是而已今爾等三歲之績既應其狀可不遷以勵之其各遷一等往服爾事益思自進亦惟休哉可

應才識兼茂明於體用科新授河南府澠池縣主簿蘇轍可試祕校充商州軍事推官

勅某朕奉先聖之緒以臨天下雖夙寤晨興不敢康寧而常懼躬有所闕羞於前日御便坐以延二三大夫垂聽而問而轍也指明其微甚直不阿雖文采未極條貫

靡究亦可謂知愛君矣朕親覽其獨嘉焉其以轍為州從事以試厥功克慎爾術思永修譽可

西京左藏庫副使夏元象可文思副使

勅某彭武一道西夏之吭而諸部之翰也其將吏必皆材選而爾元象既參其屬今考其歲成則又當遷焉文思之副前列之寵其思所以克稱者夙夜無懈可

祠部郎中判三司鹽鐵句院呂公孺可刑部郎中勅某三司主國大計益重事也故其屬皆朝廷之選精

能彊力之士而公孺也出入數遷甚稱其職惟爾公孺
大臣之世修潔有立以自致於位朕誠嘉之故因有司
之籍遷爾左曹之正以顯爾名以彰朕恩其往祇服永
有爾休可

右十牛衛長史閣門承受陸思恭可舒州桐城縣
主簿

勅某執事殿閣有年有勞按用舊典叙爾於王官之後
往服所職慎厥身修思永可

堂後官膳部員外郎馬千之可倉部員外郎充堂

後官

勅某夫三公坐大府以論道輔政故不親小事而以爾諸吏奉行文書檢察纖悉然其責亦已重矣惟爾千之從事累歲祇慎周密克濟其職故增其秩一等以報爾勞以勸爾類其往服我休顯之命無易可

西京左藏庫副使高允元可文思副使

勅某武吏以材勇進以功力賞古之制也方天下無事

兵革不試則汝武吏安得自効以取賞哉然內外之職
歲月之勞亦不可遺也今允元最狀既應陟法其增秩
一等以明勸羣吏可

故樞密副使贈兵部尚書王疇遺表長男太廟齋
郎岨可太常寺太祝次男嶠嶼嶰可並祕書省

校書郎

勅某等朕方圖爾考之材登於右府以左右樞機遂觀
其成而不幸即亡朕心永傷何有窮已故推恩徧於爾

等其各思所以自立以紹爾家以稱朕意可

親姪愕可守將作監主簿

勅某爾之叔父朕所用大臣之良也朕哀其早世既推恩徧於其嗣又延叙及爾朕之於爾叔父可謂盡矣爾其自勵無辱朕命可

國子博士劉舒可虞部員外郎

勅某朕垂拱法宮以守四世之成嘉與士大夫共之而勿失然則內外奉職循理之吏皆朕之所與進也今有

司言舒功狀當陟其命增秩一等以信三歲之典以稱朕意其往祇所服無怠可

大理評事宋慶曾可光祿寺丞

勅某朕惟爾祖先帝之大臣有勤勞於國家爾父方執史筆以事朕左右爾克承其世官簿以應審官之法來上朕誠嘉之故陟爾承於光祿其益思厥脩無替爾服可

前保信軍節度推官慎鐸可太子中舍致仕

勅某夫壯而盡其力老而還其身士亦可以無愧矣今
聽鐸之請而進其秩於朝者之後使有以榮其歸路其
欽承之可

故太子少傅致仕贈太子太保孫抃遺表孫男永
年可守將作監主簿

勅某朕於先帝之大臣故家恩禮無所不至今復推叙
於爾永年以順爾祖之志吾於孫氏可謂盡之矣其往
祇服可

仙韶副使張氏劉氏可並掌樂依舊仙韶副使

勅某禁省內職各有司列故遷叙爾各有品制不可逾也
以爾選於樂府克善其工遂佐使事今復進爾典樂之秩
以為爾恩其益慎於職無怠以永有光寵可

崇儀副使李克忠可六宅副使

勅某武爵有諸司使以賞有功以序群材益云顯矣豈
易進哉今爾克忠閥閱之狀既應賞法則雖顯爵亦不
可得而吝也其升之上列以示勸其衆汝其祗服無斁

可

空名試監簿

勅某水溢於河以害京西故命興工徒以塞之而汝能獻粟以佐其役朕所嘉也其錫之一命以報其忠可

駕部員外郎王誨可虞部郎中

勅某夫公卿之世能保其家以不失其繼者朕皆欲安護之以始終大臣之恩况汝誨學行純固克濟其美有聞於時而有司方言汝功狀當陟實有以稱朕之意其

遷誨正於即位往祗厥服思永終譽可

太子中舍王永可殿中丞

勅某審官以三歲弊羣吏之治而進退之其從來久矣
今上汝官簿無負於法當進者也其進之一等以信常
典以勸在廷汝其欽哉可

屯田員外郎黃照可都官員外郎

勅某河東踞西北之會地險兵彊自古以為重故其守
帥必吾左右文武之臣而其幕府亦必才能強濟之士

而汝照實被其選必有以稱其任矣今有司計汝舊課故進汝秩於中都之次蓋常典也吾有不次之賞須汝嘉績於後汝其懋之可

右驍衛大將軍龔州刺史宗瑗所生母耿氏可同
安縣太君

勅某春秋之義母以子貴蓋先王之制也後世莫不倣焉具官某母氏溫惠有德被選宮邸克生令子冠珮立朝乃因壽聖之慶自列丐恩朕敢忘先王之制不成爾

子之志哉其封君大縣以示國禮數之寵可

供備庫副使錢適可左武衛將軍致仕

勅某陳力就列既得班諸使之後顯矣今乃自請以不能而去其位是可嘉者其進適於環衛之列使歸榮寵安於家以報其勞往維自休可

皇姪右武衛大將軍仲林可安州觀察使安睦侯勅朕親九族以協萬邦其恩至矣豈復有存歿之間哉具官某孝睦恭惠有聞於家謂宜壽考終享多福奄忽

物故震傷朕心不能以已其以安睦之使綬侯印贈於其第惟爾有知尚饗之以自榮可

磁州防禦使從式所生母南陽縣太君李氏可永

嘉郡君

勅某夫人予之於其親欲盡其心者固無窮也況有富貴之資者哉具官某母某氏躬有懿德入事宗邸有子受封既啟名縣今復以壽聖之恩進之大郡維爾壽考多福其享無已可

右驍衛大將軍龔州刺史宗瑗長女可永嘉縣君
勅其朕推親之恩以輯九族其施博矣今復從汝父之
請緣壽聖之慶封汝以大縣汝其祇服可

殿中丞尹林可國子博士

勅其承平之治官有成法羣工庶士能守之而無咎者
皆得以三歲而遷其秩顧非優哉惟爾念此靖恭於位
以爾祿無替於後可

入內內侍高班蔣永德等二十人各加恩

勅某等永昭之役大矣其奔走幹督之煩多吾中侍之
臣也今事既禮成宜有以褒顯之其各進階若勲一等
以答爾勞以稱朕意可

空名試監簿助教各一道

勅某歲饑民不自給官既為廩振之而汝能自輸所有
以為助朕用汝嘉賜汝一命以答汝誠其恭承命可

前守桂州錄事參軍胥世程可太子中允致仕

勅某州縣之職勞矣汝奔走其間至於老而自謝以去

予思所以慰汝之心使著汝之籍於朝休哉往保爾福於家可

都官員外郎勾當法酒庫鄭燾可職方員外郎

勅某群司百工在中都者雖小大各有其業必皆以才選惟汝燾學行並懋尤有善問故使登爾於前增爾秩一等其往率厥職愈勵於進不已可

文思副使曹傑可左藏庫副使

勅某秦地用武其將佐必材勇之士汝傑實充其選而

有勞故遷優其使等以明勸信賞於下尚慎旃哉

龍圖閣直學士工部侍郎李允奏醫人高昭慶可

試國子四門助教不理選限

勅某人情莫不欲康寧而壽考則醫者其可以已乎吾
既於近臣之恩無所不至而允方以爾為請故賜汝一
命以順允之志其往慎爾術無廢可

北京留司御史臺正名知班驅使官李早可蓬州

蓬山縣主簿勒留

勅某大名國之別都群司百工具有故事汝執隸御史
既有年矣視秩命士庸荅爾勞維慎厥終無辱我命可

前殿中丞李洙等可並舊官服闋

勅某等三年之喪天下之達禮不得過也汝等去位為
服既復常矣其還居於舊惟孝與忠惟汝之責懋之哉
可

右清道率府副率致仕王與權可右司禦率府副

率致仕

勅某朕受天之命承宗廟之重大賚四海暨爾臣工咸與之進故命與權升副司禦往廸寵休思慎厥稱可

中武將軍儂宗旦可右千牛衛將軍

勅某爾遠在徼外有地與衆而能嚮義循德深報忠順不失其守朕實爾嘉故遷爾環衛之貴其益恭畏無易以永保爾祿於後可

贈工中王裕長男無逸可試將作監主簿

勅某爾父為縣擒盜奮身不顧遂至戕沒朕所震嗟既

已褒顯贈卹之甚厚又推叙及於汝等其性祇畏思有
修立無墜爾考之烈可

職方員外郎致仕區法男令輿可試將作監主簿
勅某爾父陳力之久自請還事而為爾祈恩故吾以爾
試工正之屬以報爾父之勞其夙興夜寐思所以自立
無墜厥世可

西上閣門使王道恭可康州刺史仍舊西上閣門
使成都府利州路鈐轄

勅蜀古之建國今雖郡縣而連城數十地險以遠故常以文武之帥兵而守之又以材勇之將為其佐皆慎左右之選未嘗輕也具官某功臣之世克濟其美將命宣旨有勞內外朕所察焉其以道恭領州刺史之符往貳成都之帥其悉乃心以績乃考之烈無墜我不顯之命可

持服人前內殿承制閣門祇候郭士選可禮賓副使前禮賓副使郭士逸可崇儀副使東頭供奉

官郭士達可內殿崇班


勅某等朕惟親親之誼布恩於下一均無間故今並進爾士選等官以順爾母將歿之請其各率身就禮無忘孝忠以稱明命可

江浙等路提點鑄錢公事職方員外郎何若谷可

祠部郎中

勅某國家置官東南采山鑄錢以給縣官之用通百姓之利益非精能強力之吏不能任事朕既選於衆用爾

若谷又遷瀚尚書左曹之正以示恩數之異其往思所以稱職之効無怠可



西溪集卷五

欽定四庫全書

集部

西溪集卷六

詳校官庶吉士臣馬履泰

檢討臣何思鈞覆勘

總校官庶吉士臣何思鈞

校對官中書臣李奎

謄錄舉人臣孫炯

欽定四庫全書

西溪集卷六

宋 沈邁 撰

都官員外郎楊異等可並職方員外郎殿中丞李
之純可太常博士屯田員外郎張宗雅可都官

員外郎

勅某等朕綜核名實信賞必罰庶幾乎吏稱其職民安
其業如漢之全盛時故攷百工之績而陟降之未嘗不
詳且慎也今有司以爾等伐閱之狀來上咸應于法而

無殿者其可以不賞而陟之哉其各增秩一等尚書副郎秩宗博士皆清選也其各懋之與我同底于治可

虞部員外郎朱仲元可比部員外郎

勅某瓊管四州在大海之中古島夷之地也自前世以來數服數叛而嘗棄之矣國家威德加乎方外故請吏納貢得比中州然將命以往者亦以勤矣惟爾往為之守兩歲而還撫輯有方王制無廢申按故事是應呂賞故增一等之秩以答萬里之勞往哉祇服可

梓州司戶參軍集賢院年滿孔目官馮天錫可守

婺州金華縣尉

勅某給事祕府亦既有年其勞可書官以為報大縣之
佐厥職姦寇往惟勤畏無敗常慮可

草澤國子監篆石經章友直可試將作監主簿不

理選限

勅某夫五經之列於學官定以隸古而傳於學者布於
天下益已久矣然尚念其文字或失而謬也故詔使考

其真而著之石以為後世法維爾友直實以小學之選而參其事今有司言爾篆體之精能盡師法又博習多識修潔有守願以官之故朕錫爾一命試于工正之屬以答爾勞呂表爾能其往祇服可

祕書丞歐世英可太常博士

勅某朕坐法宮出號令以制羣生之命而其所以承流而宣化者莫重於郡守蓋其於民也獨親於政也獨專豈非重哉其法度甚備其訓告甚明有能稱朕之選且

不次而賞之今進爾一等之秩者蓋三歲之常典非所以褒爾為州之能也其祇聽朕命懋之畏之以取不次之賞可

御前毛詩學究及第梁舜舉可守輝州司法參軍
勅某爾前以明經來試于庭既當吾選而念爾尚少未
即任以吏也今既冠矣其於人事亦已習乎往掾州郡
謹奉常憲毋有奸數可

前守將作監主簿曾孝雍可服闋舊官

勅某夫三年之喪亦已久矣先王制禮不可過也爾昔者銜恤以去位今其復常以從我還汝舊服恭我新命事親孝者事君必忠爾其念哉可

太常博士郭琪可屯田員外郎殿中丞劉介可國子監博士贊善大夫石升可殿中丞國子博士王諤臣可虞部員外郎

勅某等書曰知人則哲能官人蓋堯舜之所難也然所以能使百僚師師百工惟時者非有考績之典歟今夫

外廷之士衆矣固未嘗人人而從容乎朕前也然則安得人人而辨之哉故祖述唐虞憲章三后所以損益審官之法甚備庶幾乎黜陟之明勸沮之信而在位者皆得其材今乃以爾等來上皆應其法而當遷者也朕甚嘉之其各遷一等往服新命毋忝我不顯之訓可

奏舉人前真州錄事叅軍李及可著作佐郎奏舉人前青州錄事叅軍趙億可大理寺丞

勅某等州縣之吏以千數吾未始一登進於前而辨其

賢不肖也故命有司考其推薦之多者用質其殿最以聞朕則親臨而擢之夫豈不重且慎哉惟汝等其選也或屬廷尉或佐東觀往悉乃力以服乃事毋俾有壞以負我重且慎之意可

宮苑使宋有言可南作坊使

勅某內朝諸使武爵之顯也夫豈嘗輕以命哉以爾小心寡過歷職之久其勞可書故遷正使之列以為爾報其往悉乃力祇率常憲毋忝顯爵以廢朕命可

將作監主簿任廓可奉禮郎

勅某筦庫之守出納之各有司之事爾然累日計歲祈
利程功亦不可不賞以為勸也故今考爾之績遷秩一
等者所以答爾三歲之勤夫能大者任重勞多者報豐
維爾勉焉毋羞于後可

大理評事梁彥通可光祿寺丞

勅某河東吾股肱之地而西北之樞也故以舊相帥之
其兵事之秘軍書之密益有不得聞于外者汝實參焉

克幹父蠱以濟厥功吾甚嘉之故命有司考績增秩光祿益慎機畫罔有隳墮可

虔州雩都縣主簿趙定可大理寺丞致仕

勅某夫鐘鳴漏盡夜行不止古人之所耻也今汝乃以捕盜為功而自列吾方信令於天下豈可獨遺于爾哉然汝之老亦不可復參吾官職之事矣其升秩廷尉歸安於家足以自榮其往祇服可

前守莫州鄭縣令劉庠可著作佐郎

勅某匈奴慕義歸服北方無事然猶宿兵積穀以備豫
不虞顧漕輓之弗能給也故設平糴之法推賞募吏以
辨之今有司上爾之最實應於令且察爾俊造之等治
行甚美任舉者衆故擢爾東觀之屬蓋文學之選也亦
云寵矣其往祇服可

奏舉人前忠武節度推官楊甫可大理寺丞奏舉
人前河南府偃師縣主簿兼縣尉事甄履可著
作佐郎

勅某等夫士之未達也不患乎不知于上患乎身之不
修既知于上而發聞光顯矣顧可不善始善終哉今爾
等繇州縣之卑而至乎朕前則擢爾于王官可謂發聞
光顯矣爾其夙夜以思靖共厥位益保多福可

著作佐郎任桶可祕書丞大理寺丞劉長年可太
子中舍

勅某等有百里之地斯可以為政矣耕桑有時也勿奪
焉貢賦有藝也勿擾焉衆之所利者導之衆之所害者

去之先之則信勞之則悅繼之以無倦如是而已今爾等所居皆大縣也亦嘗念於此乎有司考績蓋用常法升位于朝我恩則厚爾其服我之訓夙夜以思無作官辱無起民羞無廢我不顯之命可

故司農卿陳宗元孫男仲甫可試將作監主簿

勅某九卿顯爵也法得任子若孫故雖其歿猶弗遺爾惟宗元實司農之正不幸殞謝故推敘及爾錫以一命試于工正之屬爾其夙興夜寐聿修厥德無忝爾祖可

永興軍節度推官大理評事前知儀州崇信縣事

尹光臣可大理評事充山南東道節度推官知

梓州東關縣事

勅某爾前以察廉為縣未久而以親喪去今既復常矣
其還爾舊百里之地有民人焉有社稷焉惟爾為政賞
罰有典爾其懋之可

虞部員外郎致仕滕宗愈男希孟可試將作監主

簿

勅某夫引年謝政之臣吾所以加優其恩以及其嗣者
豈特報其壯時之勞亦欲慰其歸休之心而勸吾士大
夫始終之禮也維爾父陳力之久老而還事朕甚嘉之
故褒敘及爾錫以一命試于工正之屬爾其慎修思永
以安爾親以稱我意可

相州湯陰縣主簿麻永圖可太常寺奉禮郎致仕
勅某爾為州縣吏者二十年矣曾不能自奮呂求為可
知乃嘗坐法以廢今既耄矣始乞身以去顧奚足以稱

者獨哀其犇走之久故加以京寺之屬以優其歸嗚呼
尚使仕于我者知我之仁哉可

溪洞鶴州知州向守興可銀酒監武餘如故

勅某世以武烈名于南方遂有厥土而忠勞鄉順繼繼
不急朕甚嘉之故今命汝王官之真以典一州之衆汝
其恭我職貢固我疆圉毋隳而舊以永福祿可

前權亳州觀察推官蔡天球前唐州桐柏縣令陳

紘可並著作佐郎

勅某等夫士之難進也不患乎上之不知患乎名之不立此古之人所以難進也今汝天球暨絃皆以儒自進而任州縣有聞於衆有薦於朝故朕命有司登汝使前竝擢汝東觀之屬列于王官朕斯知汝矣其各往思夙興夜寐圖永終譽無累我明可

供備庫副使郭琪可西京左藏庫副使

勅某嶠外五管容南都會為之守者又總監一道之兵以佐其帥其任重矣今以爾琪往夫內則吾民外則諸

蠻撫之以恩接之以信皆可懷也夫何內外之有遷躡
使列以為爾寵汝其戒之善輔爾帥毋忝我命可

內殿崇班曹誌可內殿承制

勅某功烈之世既位於朝配我宗女實維材選賜秩一
等奉承制旨往服優寵夙夜祇戒無有敗逸可

特奏名進士諸科可並逐州長史文學

勅某等朕既以延天下之士試於廷而賜甲乙之第矣
又念爾等易農而學應書躬策至于歷年且老而無所

成其名甚可慙也故命有司條上覆之於前均賜一命
叅佐州服以為爾寵往哉祇省知我之仁可

內殿崇班吳惟寧等可並內殿承制

勅某等文武班爵之法各因其材而為制不相奪倫其
考績黜陟以示勸沮則一也爾等並以勞次序位殿中
從朝者之後今復以歲格遷爾一等進承制旨益顯于
廷其各往服蚤夜祇戒思稱厥職尚克荷我之命可

祕書省正字吳安本將作監主簿劉士劬劉士彥

並可舊官服闋

勅某等喪不過三年所以告民有終而呂節制者也禮之大體於是乎在今有司舉故事言汝等執喪自去日月當復故申命於朝還汝于位雖曰舊物其命惟新尚使身立而名揚孝之終矣可

秘書丞孔宗翰可太常博士

勅某先聖之後四十七世世有聞人以紹厥家蓋盛德之裔必當有顯雖百世可知也惟爾宗翰質行之茂文

辭之富能濟其美熒然有聲而自登俊造之選升位于
朝三歲于茲矣有司考課遷爾于奉常博士其往率厥
職益進於道尚無忝於前人無墜於我命亦惟休哉可
右贊善大夫蘇涓可殿中丞

勅某夫三歲考績唐虞之所以任百官成大治稱盛德
者也朕今用之以爾名卿之後克世其家文雅有餘吏
事兼邵故因有司大比之狀命爾以遷丞于殿中漸于
顯仕勗哉自進於義無怠無易尚有不次之舉無聞於

爾也可

著作佐郎張元方可祕書丞

勅某審官樊羣吏之治三載而一上之有司之常法也
朕總覽綱紀躬親吏治視其幽明裁以進退所以示誅
賞御臣下也惟爾前實有罪故朕格有司大比之籍不
即用汝使汝退而思戒今更一歲尚克自厲矣進丞舊
者從朝者之後斯實優渥汝其畏之毋重往悔可

屯田郎中陳徽卿可都官郎中

勅某四海之廣生民之衆一受制於朕朕豈獨能治之
哉其所以共之者郡縣守令是也然則天下之治否常
必由之矣其可以失其人與以爾繇文學之選周旋于
外稔有善狀故以爾將一州之師今有司大比又增爾
郎位一等寵益至而身益尊矣亦能承流而宣化稱我
之意乎其明聽朕訓先之勞之無倦庶幾卓然之効以
布不次之賞也可

三司度支判官工部員外郎充集賢校理宋敏求

可刑部員外郎餘如故

勅某司農制天下之財以足國用以調盈虛東觀聚天下之書以育人財以出禮義士大夫之選莫重焉惟爾敏求並應厥任柔而立愿而恭直而溫好學不倦彊力有餘朕甚嘉之故因有司考績之典增爾郎秩一等司刑之副尚書高選往服于位益修不怠朕且圖爾之用可

庫部郎中宋忠臣可司農少卿

勅某九卿之貳為爵高矣外廷之士計日循級而能至者幾希惟爾服在朝序周旋吏事厯歲滋久其勞亦多考績來上遷爾于大農之副寵益至而身益尊矣其亦能卓爾而立發于事功以稱我之恩乎其勉無怠可

翰林侍讀學士右諫議大夫環慶路安撫使兼知慶州韓絳奏進士張康可試國子四門助教不理選限

勅某爾以儒自名而實以鑒為伎入游京師衆用稱焉

乃有薦者願得齒于士籍故錫爾一命為吾近臣之恩
其益慎操術毋重辱也可

教坊使杜仁經等加恩

勅某等海內治安朝廷穆然朕誠與羣臣樂之而以時
燕教庶乎交其驩欣以及萬民則爾等執樂之工豈無
勤乎矧大禮告成澤及天下亦不可遺也其各推之寵
名以示溥博無外之恩可

司天監靈臺郎史繼莊等可並司天監主簿

勅某等昔先王建大中以當天心觀天文以察時變故有日官以底日禮也今爾等職太史者十年于茲亦已勤矣其各增秩一等往序厥職夙夜精思毋昏迷于天象以干邦法可

太常少卿葛宮可光祿寺卿

勅朝廷治定百年法制寬裕士大夫各居其位能遵職謹業以無大過累日計歲以至高爵者豈非承平之致歟朕方嘉之寧有愛於爾官師哉以爾具官某文學之

第自底厥躬更職于外具有告狀遂貳卿列今復進爾
光祿之正夫九卿重祿也一州重任也羣材在廷能臻
此者幾希矣爾將奚以為稱奚呂為報耶其往思之究
之身愈尊者責愈至可不畏哉可

逐使人宋易從可沂州參軍

勅某有司奏爾前罪甚醜是既棄而弗收宜矣然裕廟
大慶恩被動植豈獨不以及爾哉其復著於籍參掾下
州嗚呼爾亦有知者乎尚知我之仁有以自訟無羞于

我多士可

京東轉運使祠部郎中成奕可刑部郎中權陝西

轉運副使金部員外郎薛向可司勳員外郎

勅某等四海之廣郡縣之衆朕所以付而治之者轉運使是也顧非重哉自京以東距于海兼齊魯之制汝奕主之自陝以西至于戎盡秦漢之畧汝向主之奕也有長厚之譽向也有膚敏之實並以材選而往將命能稱厥職朕甚嘉焉故各增爾秩一等以昭陟明之義爾其

祇服凡為吏太剛則折太柔則廢爾其戒之維秉厥中毋違我所以付治之意可

司勳郎中充祕閣校理孫瑜可太常少卿餘如故勅某祕府藏室吾所以官俊能之士而四海之淵源也然遷不以時而使有流落之歎恩不異衆而使有渾淆之議則士大夫何勸焉以爾瑜名儒之世學問自給參備儒省歷年之多是謂久次故陟爾奉常之貳蓋九卿之高選也光寵多矣爾其畏服毋替我命可

經恩敘理追官人前內殿承制曹諷可崇班

勅某朕前舉大袷之禮薦于宗廟既而推恩海內與物
更始故雖有負罪去籍之吏亦得進而用之豈非溥博
之施哉今敘諷以漸班于殿中我德厚矣汝其思厲有
以自新毋重往悔可

堂後官右贊善大夫馬千之可殿中丞餘如故

勅某三公之府萬事之本其地勢也重其樞機也嚴然
則為之吏者亦難矣以爾端飭廉敏從事歷載益勤不

怠故增爾秩一等仍其故服愈念周密毋隳前效可

特除名人王方可鄭州叅軍

勅某人臣之誼守官守節不易之道也前日南徼羣獠
乘邊無備闕我城邑而汝攝事刺史之半不能死之遽
先棄去以自遁邦有常憲故除爾吏籍與衆共之今大
禮之慶推恩四海故又推敘及汝參于州掾汝其自省
知我之仁可

尚藥奉御直醫官院栢仲宣可醫官副使

勅某周禮醫師掌鑿之政令歲終則稽其鑿事以制其食今爾仲宣執技從事為日已久故復審覈厥能進秩增祿貳于其長爾其益慎于術以佐政令毋有怠忽可
內殿承制閣門祇候曹偓可禮賓副使

勅某元功之後戚里之屬既位於朝今復緣朕誕日之慶增爾之秩貳于諸使以為中宮之恩爾其祇畏修省以保寵祿無蹈咎悔可

將作監主簿李昭璉可大理評事

勅某夫考績之法唐虞之所以熙百工而成大治稱盛德者也朕今用之以爾繇俊造之選參工正之屬而有司稽閱應于陟典故升爾于廷尉之平其漸光顯矣往哉祇服可

莊宅使端州刺史內侍押班石育可內侍右班副都知餘如故

勅某中外之臣出入帷幄受宣詔命宿衛親密非端信廉飭小心寡過者不可用也况參總厥任當內宰之責

豈可輕哉以爾服事左右多歷年所遂領近班而忠勞
自資日益不懈朕甚嘉之故升爾貳于內侍之率爾其
夙夜思畏毋以寵自矜毋以權自怙庶幾乎永保爾祿
無負我恩可

奉職張文簡

青州

張袞臣

鄭州

可逐州長史

勅某等三班武吏輕矣其有驅馳服事之久而能以禮
請老而去者亦可嘉也其各以參于大郡之佐歸安于
家有以自榮可

賢妃苗氏奏親姊永安縣君苗氏男習進士張士
昌菀國公主奏苗賢妃親甥甥習進士張閱可

並試將作監主簿

勅某等屬者朕誕日之慶均賚宮闈使得推及近戚今
賢妃暨充國公主乃以爾等為言皆苗氏之姻也其各
錫以一命試于工正之屬其往祇服思有攸立毋辱于
位可

三司度支判官祠部員外郎直集賢院同修起居

注王安石可刑部員外郎餘如故

勅某左右史以記言動以立書法以觀後嗣其任莫重焉故朕選于衆以爾安石為之惟爾安石經明行修秉君子之節材劇志大通聖人之方信其可以任重而致遠簡在乎朕心者矣今遷爾郎位一等蓋有司之常法亦非朕所以畜爾之意也爾其往服待我之用可

內殿崇班宋熙可內殿承制

勅某西戎即敘邊無大警而執兵誰何之吏猶累日計

歲以受賞豈非幸哉爾前罷鎮戎既得推恩矣今復自陳不已朕亦何愛而不以勸有勞者乎其升秩一等奉承制旨往乘一鄣思有所報可

文思使康州刺史沈惟恭可左藏庫使

勅某內朝諸使武爵之貴皆所以賞勞能馭材勇者也豈苟幸於人哉然前日乾元之慶均賚宮闈使得推及近戚而德妃乃以爾惟恭為言朕豈復愛數等之名而不以慰妃之意哉其升序前列國帑之正寵轂多矣爾

其思服無斁常憲可

樞密副使給事中包拯妻仁壽郡君董氏可進封

永康郡夫人

勅鵲巢采繁召南之風王教之本而公侯之事也具官某妻董氏出于盛族而有溫惠之實歸于良士而有輔佐之效今朕既以拯貳于公府而執機柄矣則其中壺禮命之數有常典哉其疏以名郡為湯沐以稱小君之寵可

六宅使端州刺史郭遠可果州團練使充龍神四

廂都指揮使

勅王者六軍內以宿衛京師外以威制諸夏其將帥之
任莫重焉以爾具官某志節材氣勇有餘裕周旋疆圉
其勞可書故歷選於衆以爾董我連營之師且優以團
結之秩爾其執軍之律謹國之法以樹功揚名稱我所
以擢爾之命可

司勳員外曹元舉可依前官充三司鹽鐵判官

勅某國家之大計在三司而鹽鐵又貨利之豐也任其事者必能吏乃稱焉以爾元舉夙用敏給明習法令治郡刺部咸有善最故以爾贊司會之劇夫多取則病於下少取則廢於用維其盈虛歛散以足國裕民繫爾之能其往祇服可

衛尉寺丞胡宗質可大理寺丞

勅某有司計羣吏之治三歲而後進退之所以序人材明誅賞古之道也以爾宗質自丞司衛簿狀無殿協于

陟法故升于廷尉以漸光顯其往祇服毋怠厥修永有爾祿可

持服人前西京左藏庫副使武永孚可依前官免持服

勅某夫喪以去位禮之經也起以從事政之權也古有之矣朕今用焉以爾永孚材武幹用厯試既效不幸而至於大故方障戍擇人之時豈得使遂其無窮之心哉其彊復爾位往守北壘事親孝者事君必忠吾所望於

爾焉可

祕書丞直祕閣充編修唐書官呂夏卿可太常博
士餘如故

勅某天祿石渠典籍之府禮樂之源非修潔博習之士
則弗能稱其任惟爾夏卿材質之美術業之卽預成唐
史遂參書閣斯可謂能稱其任者矣有司弊三載之治
故遷爾奉常博士亦文學之選也往服厥位益進于道
有以廸我顯命可



皇姪孫故右監門衛大將軍仲翹可贈眉州防禦
使追封通義侯

勅朕於親親之恩既無所不至矣況其殂歿豈復有所
愛哉惟爾具官某孝恭端飭早有令聞謂實宗子之望
奄忽凶告盡傷我心何可及已其命有司贈以州使之
綬侯國之章以慰爾靈以揚我寵爾其饗焉

屯田員外郎王袞可都官員外郎太常博士杜保
衡可屯田員外郎

勅某等朝廷治定士大夫幸當其時而進於位以周旋
乎太平之致豈非休哉然患常生乎久安而因循苟簡
之弊不能無也在乎彊勉而已矣詩曰夙夜匪懈書曰懋
哉懋哉今有司弊三載之治故各增爾秩一等其各往
服祇我明訓思有攸立毋自斃敗可

前簡州平泉縣主簿李佶可守祕校致仕

勅某始仕州縣而已老矣乞身以去亦可嘉焉升秩京
省歸安閭里恩禮之厚來者知勸可

隰州司理參軍劉安仁可光祿寺丞充大理寺詳
斷官遼州平城縣令韓晉可大理寺丞充本寺

詳斷官

勅某等書曰五刑有服惟明克允然則刑者教之輔也
使或不從而不信則民無所措其手足矣教何有哉俗
吏不知經術亦安及此今以爾安仁暨晉卿咸以明經
而進試之法律又習故並以為廷尉之屬其往率厥職
惟通惟平毋背于先王之訓欽哉可

奏舉人前同知邵陽縣令張于可著作佐郎奏舉
人前權西京留守判官張宗說可大理寺丞

勅某等天下士大夫達於朝廷者吾既知之矣彼州縣
之吏動以千數卑且遠矣朕亦何從而辨之乎故設為
薦任之法而取之一有污敗刑茲無赦然則薦而任之
者亦已艱哉今擢爾于東觀宗說廷尉並列于王官其往
祇飭保爾一節毋辱于已知毋背我官訓可

盡邊花藝學澄州無虞縣主簿御書院祇候馬用

可中嶽廟令裴界藝學南州三嶼縣主簿御書院
祇候朱懷玉可東嶽廟令

勅某執技於府以勞自陳据其舊次宜被推賞嶽鎮祠
宇具有職事往服惟慎毋自隳斁可

內殿承制雷周輔可供備庫副使

勅某全蜀之廣制為兩部各置守將以治兵民其任重
矣今以爾周輔往佐軍事又進爾于諸使之貳以重爾
行其往周悉乃心宣乃力軍有常律毋得怠廢可

比部員外郎致仕黃仲英可加上護軍左清道率
府副率致仕鄭蛻洗馬致仕張道可並加騎都尉
勅某等朕前以大裕之禮薦于宗廟既事告休推廣慶
賜罔有遠邇莫不周浹况吾士大夫陳力之舊歸老之
美而可遺乎其各賜勲一等以稱朕意可

吏部員外郎知制誥兼侍讀楊畋可依前官兼侍
讀充龍圖閣直學士知諫院

勅朕總御綱紀博覽兼聽庶幾乎先王之治而聰有所

未達明有所未燭實賴二三大夫為吾耳目朝夕納忠
以自輔然舉以任其責者常難其人具官某直清之操
卓爾不羣閔達之材綽然有裕出入內外簡在朕心傳
不云乎如有所譽其有所試其以畋陞于延閣長于諫
臣嗚呼朕之舉爾可謂盡矣爾其觀古名臣所以獻可
替否守節徇義之烈以思自効以稱朕意焉可

度支員外郎直秘閣同修起居注司馬光可起居
舍人同知諫院餘如故

勅某朕奉祖宗之成業以臨天下夙興夜寐而欲寡其
過未能也故博延亮直之臣使得裨補警戒其不迨庶
幾有益故察于羣臣而得爾光惟爾光學有源本行有
師法方而能通直而不撓可謂卓然特達者其正秩右
史叅職諫省往服乃位盡規毋隱務稱朕所以舉爾之
意可

韶州樂昌縣主簿兼縣尉事梁師孟可太常寺奉

禮郎

勅某天下之貨聚於三司三司之法能任事者賞之豈
務於多取哉足國經費而已今其言爾前採韶山之鉛
以贍鑄錢其利歲倍於法當賞故升爾太常之屬以答
爾勞其往祇服可

廣南西路鈐轄皇城使忠州刺史宋定可果州團
練使舊官充廣南西路安撫都監兼知宜州

勅某竊外夷僚數叛不賓誠德不足以懷也將威不能
以服也宜州在西之衝為一都會鎮禦備豫尤難其才

惟爾定材武忠勇有古將帥之烈周旋南鄙勤勞不怠
是宜舉其已試之效優以團結之秩撫輯一道專守千
里有民有兵其任重矣爾其宣我德澤揚我威制尚使
蠢爾之蠻面內來化時乃之功其往祇服可

刑部郎中充集賢校理馮浩可依前官集賢校理
充三司度支判官

勅某三司制天下之財而度支獨主國之大計其出入
多寡之數則有常矣而盈虛輕重之宜豈無術哉故非

精明通習之能亦不可以與也以爾某文學之選列在東觀嘗佐京兆又使外部更事多矣宜佐司會之劇以勸其効爾其往服夙夜自強圖稱服命可

皇親兒男賜名四十七人可並右內率

勅某國家神明之後本枝百世蕃衍無疆朕既丕受上帝之祉曷敢不施于爾孫子哉故因乾元之慶申詔宗正悉奏諸孫之能勝衣者四十七人制名命官咸傳之籍咨爾父兄尊爾師保慎爾威儀使幼子有所視有所

聞長而無犯於非義以成乎信厚之德豈非休哉其識
朕指無忽可

宜州鄉貢進士區宋臣可本州文學

勅某遠人之陋學者常少有能自表於衆是可進焉以
爾宋臣出于嶺徼而嘗與計偕來今且老矣而無所成
其名自陳于朝有足憫者錫爾一命歸榮州里尚使海
隅之俗知有所勸可

西溪集卷六

欽定四庫全書

西溪集卷七

宋 沈邁 撰

賀正表三首

伏以推二氣之元求三統之法斯得天數以為王正傳
會千齡之期鼓舞多方之慶中賀恭惟尊號皇帝陛下稽
受皇策答揚祖休克謹持盈之圖坐收前世之烈中外
底輯神人以寧登太平之歌方傳之於不已錫皇極之
福固受之以無彊臣等叅服宰司親逢盛旦率籲官師

之衆鈞同朝野之歡

伏以推六律之本以求陰陽之端考三統之元以觀日月之會實得天數著為王正誕當十載之期允屬一人之慶中賀恭惟皇帝陛下欽明文思神靈徇齊奉祖宗之成基兼帝皇之能事天方顯相我用丕承登壽考於萬年豈特比商宗之永開本枝于百世固將齊周室之隆臣等祇服宰司籲先羣辟仰對罍恩之峻敢傾祈頌之虔

伏以具物於春聖人所以撫節有為於政王者所以求
端中賀恭惟皇帝陛下臨教保民晉明燭部會年位之始
浹天人之驩異俗來威百昌薦貺臣守郡于外不獲進
慶闕庭

賀冬表二首

伏以氣復於陽數生於子日月閏積之所起寒燠風雨
之所占中賀恭惟皇帝陛下獨運乾剛紹繩祖武拱天序
之正鑒生民之康一新靈辰交薦福本孚佑遠祚坐臻

太寧臣遠紆郡章隔望朝弁但馳存闕之悃莫綴充庭之聯

伏以日極於南考為三統之法陽生以復推見二儀之心當歷紀之開元宜帝符之錫美中賀恭惟皇帝陛下志氣獨茂輝光日新運神化於無為均成功於洪造天瑞來格民靈樂胥奏封禪之書方且發興人之頌歌天保之雅固將充萬壽之期臣等備位明庭逢辰大慶無以褒揚於盛德維知鼓舞於太平

謝春服表

伏蒙

云

春物始和恩仁下逮申詔攸思之舊匪放在

笥之衣拜賜知榮撫躬慙愧中謝恭以皇帝陛下邁
熙聖緒高拱太平憲天端以敘彛倫揭時令以垂大法
乃茲仲月均錫官師臣等備位在廷逢辰多慶服之不
稱實畏詩人之譏褫於終朝益思易象之戒庶殫乃力
以補厥尤

謝冬服表

伏蒙

云

大火始流清風既應告歲終于天吏發時令於

王庭申命攸司匪攸在位粲然束帛之厚寵如華袞之
褒臣等中謝恭惟我皇帝陛下德暨九圍仁深萬物感
肅霜之節嘉獻裘之勤思與官師並均安燠悉推在筭
之惠俾無卒歲之憂臣等參服典司親逢嘉靖功不勝
祿已負素餐之尤服非稱躬更招彼其之刺幸收它効
得謝至恩

中書賀壽星見表

至治升聞休符協應發乾文於南極告壽考於一人海
縣同瞻民靈胥慶中謝恭惟我皇帝陛下德音獨茂仁
性自然致孝於上下神祇推恩於內外夷夏若臣庶之
細安能報稱於萬方維昊穹之靈固將保佑於千億倬
焉垂象允矣示人臣等參服近司親逢嘉應仰望顯印
之坐俯深踴躍之歡

中書謝譯經御筵表

社鳴紀節式尊誕聖之辰貝葉翻經方祝後天之壽恩

推慈惠宴旅豆觴仰承覆露之私俯愧亨嘉之會中謝
伏惟我皇帝陛下清淨自懋欽明日躋遠追九皇之蹤
近屬三后之統福祿是荷坐致無疆之休神人具依共
持不拔之祚臣等參居宰席並受國恩敢資西竺之勝
因庶効華封之善頌重當飫賜益戴上仁

賀即位表

皇帝陛下以今月初二日奉膺顧命纂臨大寶乾坤交
泰日月著明普天之下謹呼鼓舞中賀臣聞易曰大人以

繼明傳曰王者大一統肇自古始迄於後來神器之傳必屬元聖伏惟皇帝陛下受昊穹之命承三后之休繼體先皇正位儲兩神祇以之克相夷夏由是宅心天人之符如響斯應上下之感不謀而同國家之運方興祖宗之業既定重熙累洽於萬斯年有生之類莫不自幸臣內聯侍從外守藩垣不獲奔走稱慶闕庭

慰國哀表

大行皇帝奄棄萬國承詔號踴絕而復生中謝恭惟我

皇帝德象天地仁育萬物臨御浸久夷夏一心奉諱之初震動殞裂伏惟皇帝陛下孝思罔極何可堪處臣伏限守郡仰遵制旨不獲匍匐奉慰瞻望闕庭

賀皇太后表

臣伏聞皇太后陛下恭承顧命進受鴻名母儀正於朝廷孝治刑於天下中賀恭以皇太后陛下體坤元之德配宸極之尊內教著于六宮陰化行於四海所以輔成前朝之治保佑大統之歸皇帝陛下祇述先猷克循要道

率有司而上洪冊奉徽稱以明至尊盛禮甫行羣倫胥
慶臣守藩於外營職有常不獲奔走稱慶闕庭

越州謝上表

臣某言

云

以親為請得郡甚優越去宮庭介居江海

就職之始撫心弗寧中謝伏念臣本維諸生知守前緒親
逢文治之盛冒塵科選之榮擢躋儒林遂執史學學不
足以達治亂於顧問實難文不能以通古今於述作何
有誤出聖明之遇進登侍從之塗僣勉備官逡巡待罪

維大恩未報豈敢便安其身顧私養弗充不勝進退之
迫輒以誠乞既茲奠居幸溢於涯感無以喻此蓋伏遇
尊號皇帝陛下天地之德覆載而無所不容日月之明
照臨而無所不暨故臣得遂其犬馬之志安於藩翰之
間况茲為州自昔建國連帶數郡之廣摠齊萬兵之權
有可以為無所于苟尚寬東顧之慮少獲萬分之心

謝賜厯日表

臣某言

云

歲事更新王正建始肇頒厯紀推授民時

中謝臣聞王事本於陰陽聖人叅諸天地能使四時不忒
然後萬物得宜自羲農以來逮堯舜之盛未有不務於
此而能遂臻厥成恭惟尊號皇帝陛下撫有庶邦規恢
大業凡四海之廣莫不受制於庭而羣生之微一皆遂
性於下自非求端之驗曷由致治之明臣職在養民幸
均受賜敢不奉行之謹以全愛育之仁

謝改官表

臣某言

云

云侍從於中初乏朝廷之補藩宣於外汙微

治行之聞此焉褒優甚矣僭濫中謝伏念臣起家單賤遭世幸榮學未造於古人而陪東觀屬書之選文不適於當世而贊右省代言之司雖繇至公實已虛受此緣私養之迫輒丐方州之行處躬苟安待罪不暇亟推增秩之典殆非責實之文齋戒奉膺啟居無措此蓋伏蒙尊號皇帝陛下總攬操柄博收臣工謂甚愚者可無它謂能守者或有立本賞刑之大信以率彛倫稽黜陟之常經以昭庶品故令踈竄之質均被寵靈之私臣敢不

夙夜以思動靜惟警終收犬馬之效無愧於中庶全天地之仁不孤其施

謝上表

自越移揚至中道再移杭州上表

守藩無狀待罪不遑連增秩以過優再易地而逾重夙夜深念啟居若驚中謝伏念臣本諸生偶奏薄技登於羣玉之府已逾所宜進於紫微之庭愈非其據庸庸徒能自守斷斷固無它奇國家之恩豈維一日犬馬之効何有萬分比請州居實迫私養曾未踰歲之久固微可

書之勤內徙淮南才及中道就更制右是為故鄉始聯
史觀之名復蠟臺郎之選寵榮駢厚憂悸更深此蓋伏
遇尊號皇帝陛下博愛為仁有容成德收報於官師者
甚薄推惠於臣庶者必隆蓋將盡得其心然後咸罄其
力況臣之陋自知甚明所以獨誓于中豈敢但期於衆
殞首之日披腹是求

代人進新脩祿令表

臣等聞古者任官以職所以均邦治而立民極也列爵

以地所以等臣功而明王制也三代以前典刑蓋畧二漢而下因革不同班祿之法隨時以定或稟以穀帛或俸以金錢蓋德高而位尊者其賜優能薄而任輕者其受寡必有等籍以為權衡中謝竊以國家造邦百年垂統萬世若稽賦祿之序參用前古之宜然內外之官大小之職其著之品者累百其分而名者幾千下逮兵爵之籍差列尤衆而舊章弗完公令罔著或援之先例或裁之一時顧不責於攸司乃數煩于中覆因循斯久創定

惟時恭以尊號皇帝陛下懋正九功緝熙百度彞倫攸敘率祖宗之規模治具畢張盡帝王之能事凡厥法制悉從刊明唯茲秩賜尚虧典則乃詔臣等以

云

修為

大宋祿令臣等祇畏承命講求踰時論次名品稽合義類據

云

所以著出祿之律示官人之方又以杜上前

之煩文還有司之常訓攷於方國俾遵畫一之規詔於將來允示不刊之典臣等智非博極才謝兼通第勤明詔之嚴敢謂成書之善將塵宸陛若蹈淵冰

代人奏請更定科場約束狀

伏以選士之法自古論之莫不以行為先藝次之蓋行
本也藝末也取其本而遺其末可也未有取其末而遺
其本也者古之所謂藝者皆可用之實尚且謂之末今
之所謂藝者皆無用之具乃專以為辯論之法甚亡謂
也然國家用進士一路以取士百年矣英才異能得之
不為少而失之亦已多何也蓋其制之有弊而不革者
爾夫進士之法固不可以猝變古者不變法而治蓋能

因其法以通之也臣竊見天下州郡發解舊有封彌謄錄之制近又有考試官不得與長吏相見之令夫州郡發解亦古所謂鄉舉里選也其任在郡守縣令先察其行乃試其藝行修而藝或不至舉之可也行虧而藝或可觀不舉可也故律有貢舉非其人之法甚重今則不然凡有籍於版者皆聚之使試既試則削其名易其書漫不知其誰何徒以雕篆之弊法考無用之空文敦朴俊茂不幸而小不如其法度則一皆黜之庸污淺陋幸

而僅不失其法度則一皆取之守令之任無所尸責律
令之設是為虛文豪傑老成則轉棄於下剽薄後進則
馮凌於上風流不支日愈一日甚非國家選賢官材之
本意也此蓋當時建議者務為苛細以希一時固不及
知天下之大公國家之遠體矣臣竊謂今朝廷方議更
定取士之制宜因罷去天下州郡發解封彌謄錄及試
官不得與長吏相見之令別為約束使長吏與試官精
加詢察依格考定必得學行兼備名實相副為衆所推

者即許解送如有背公徇私去留不允者並許論告即行推劾論罪如律所告虛者重行科斷永不得入科場仍令刺舉之官嚴加覺察務盡公議如此則材能悉收而野無遺逸濫幸既革而士知修飭又以示天下之大公明國家之遠體以為後世之法

免龍圖閣學士狀

今月二十一日准閣門告報伏蒙聖恩特授臣依前尚書吏部郎中免龍圖閣學士令臣授勅誥者聞命震恐

不知所容伏念臣質行單陋材不足用列在侍從已非
所據而比蒙進職任以京府臣所以不敢自辭者誠冀
得竭其犬馬之力幸有所立以謝萬分方夙夜惴惴大
懼不能勝其任而曾未踰月復增寵名雖國家所以遇
臣下者甚厚然非臣之所敢當也伏望陛下察臣之遇
無使過其分以速顛覆而責其來效尚不辱朝廷之恩
申戒有司收還詔書臣之願也維陛下裁許臣不勝大
幸所有勅誥臣未敢祇受臣無任激切屏營之至

免翰林學士狀

今月初四日准閣門差人齎到勅誥各一道伏蒙聖恩
特授臣依前右諫議大夫充翰林學士知制誥者聞命
震驚不知所措伏念臣起於諸生質行淺薄學問不能
純師文章不足行遠列於侍從已非所據又安可以與
聞密命對裁訓辭播之大廷達於天下者哉况今侍讀
等學士知制誥待制皆一時之高選其材能莫不在臣
之右伏望皇帝陛下察臣之愚無狀為不勝其任收還

制書而選於衆必得其人以盡公議臣不勝幸甚所有
勅誥臣未敢祇受臣無任激切屏營之至

中書謝傳宣入伏早出狀

右臣等

云

公府樞機之原所當盡瘁人臣夙夜之誼

豈敢告勞豈謂伏蒙皇帝陛下仁隱及微恩覃迨下甫
茲庚伏之候遽傳中出之言許其處休得以夙退夫王
人聽政固有四時之宜而臣職在公何取一身之闕自
非愛育之厚曷致優游之私臣等叅陪近司首被隆渥

永惟圖報之効誓在捐軀之初

中書謝譯經院御筵狀

誕聖當期方薦南山之壽繙經演法敢斬西竺之祥勝
事甫成羣靈胥慶沛發惠慈之况加優觴豆之勸臣等
參服宰司預聞譯義雖冀真乘之利仰資難老之祺酣
詠逾涯飲服無數

舉邵亢自代

伏見太子中允集賢校理邵亢器質渾厚學術精明其

辨論足以當顧問之求其文章足以備典冊之選臣所
自揆不如遠甚謹具狀以自代

自代

臣伏覩三司鹽鐵副使工部郎中吳充行義修潔資材
博敏其學術論議足以當顧問其文章體用足以裁辭
命臣前嘗舉以自代實所不及伏望朝廷特賜進用庶
盡公議

自代

臣伏見大理寺丞祕閣校理韓維虛靜之性本於自然
疏明之材可以大任臣之自揆實所不如

自代

臣伏見刑部員外郎集賢校理吳充材資自高學問不
倦施之政事沛然有餘用以代臣實允公議

自代

臣伏見兵部員外郎充集賢校理邵必端亮修潔好學
守道出入文館資望俱高揆之公議臣所不及

進奉銀二千兩狀

臣伏以聖人繼明海縣均慶凡在為城之列莫不思効
厥誠前件銀山川之精天地所寶敢備充庭之實庶修
任土之儀謹進

進挽歌辭狀

右臣伏聞大行皇帝園陵卜吉大事有期臣身備侍從
而守郡於外不得犇走執事之後不勝追慕殞裂之情
謹齋戒撰成大行皇帝挽歌辭三首

笏記

梵譯甫終將獻上乘之福恩仁下逮遽推宴俎之私拜
况過優捐軀曷報

中書謝春宴笏記

春物熙華宸居暇豫中開宴賜下逮臣工

中謝

伏惟尊號

皇帝陛下盛德對時至仁自性弗為獨樂務與衆均臣
等備位在廷逢辰多慶畧無報稱第有戰兢

陳乞劄子第一

臣輒披誠素上冒聖聰顧循罪戾殞越無措伏念臣父某昨任通判滑州保舉本州白馬縣令楊稷充京官其人近以贓除名臣父坐累於法當追一官停再念臣父歷任州縣致位於朝凡四十年未嘗一掛於法而薦任者過數十人今行年六十始得為郎而遽為舉者所累奪官免職在臣之情豈勝憂迫夙夜惟念思有以祈贖而臣蒙國寵厚備職侍從又例得計歲磨勘以進官在臣之身竊幸實多臣願移臣終身磨勘之恩以贖父一

朝之罪伏望陛下特開聖造俯察私欲許臣永不磨勘而赦臣父追官但免所居之任亦足以行常法臣不勝大願再念臣父所獲之罪非自己作獨以知人有所不盡故被坐累向使臣父自作弗善臣亦豈敢進干朝廷以屈常法犬馬之情苟賜矜納則父子立朝尚期有立以報萬分臣無任徬徨激切俟命之至取進止

第二

右臣

云

云

寵靈優厚加於無功畢臣之身不足以謝然

犬馬之情尚有未盡者輒冒萬死敢言之伏念臣昨於去年中以臣父某坐舉官事當追免臣遂具奏乞臣永不磨勘而赦臣父追官是時竊計朝廷以臣未當磨勘故不賜允納今臣父追免已久而臣幸蒙恩遷官臣之愚素豈能遂已伏惟陛下孝治天下仁覆萬物有生之類既莫不遂其性而得其所故臣之愚素尚覬得申再念臣父歷仕州縣凡四十年白首垂老始得為郎而遽以保任之累免廢在臣之情夙夜不遑安處臣願還臣

所進秩二等自今更不磨勳而許復臣父所免官一等
伏望陛下特開聖造究察私欲許檢會前奏曲賜矜可
臣無任徬徨激切祈恩俟罪之至

第三

臣聞私而求申於公者非直臣而求必於主者非順有
一於此是為罪人今臣乃負二罪而敢有言者君親之
義不得有隱一日獲罪是其甘心維陛下矜而聽之不
勝大幸伏念臣昨於去年中以臣父某坐舉官事當追

免臣遂具奏乞臣永不磨勘而赦臣父追官是時竊計朝廷以臣未當磨勘故不賜從納臣近於二月中蒙恩特授臣起居舍人臣尋兩具奏乞還臣所進秩自今更不磨勘而許復臣父所免官尋再奉聖旨不許臣又竊計朝廷以臣父坐廢於法未當敘復而齒於朝故亦不賜從納臣即已祇受并具奏其意臣近蒙恩特授臣尚書禮部郎中臣亦已祇受今明堂禮成大賚天下而臣父幸得以例敘復而齒於朝則臣之愚素猶冀得申伏

望陛下特開聖造究察私志許檢會臣前後四狀許臣
納起居舍人及尚書禮部郎中兩官而復臣父舊官依
例差遣臣之微誠賤說既以盡於前奏不復敢喋喋取
瀆於上維陛下矜而聽之不勝大幸

第四

右臣云朝廷已行之命非敢固辭犬馬未盡之誠尚
期從欲再三之瀆誅放所甘伏念臣父子立朝寵靈兩
辱在私之幸於臣實多獨念臣父當垂老之年被奪官

之責臣所以夙夜深念啟處不遑思有所圖以贖厥咎
輒上還臣身之進秩願得復臣父之免官賤誠雖明天
聽猶隔傍徨若失俯仰無措伏望皇帝陛下天地覆載
而無所弗兼日月照臨而無所不察載矜愚歎終賜俞
音臣伏恐朝廷以臣父免官未當敘用則乞留臣所納
轉官恩澤候臣父將來合當敘用許復舊官則臣以祿
養親一得如志以身報國畢當殞身臣無任祈恩俟罪
感激懇切之至

上殿劄子

右臣

云

臣相次兩具狀奏乞納臣新命復父舊官

今月七日再准中書劄子奉聖旨所乞不行便令受誥
勅者身賤言輕再三瀆上聖恩寬大不即誅殛不勝幸
甚臣竊計朝廷以臣父坐廢於法未當敘復而齒於朝
所以臣之愚請不賜從納臣亦豈敢喋喋重干天聽然
臣區區犬馬之誠父子之念實未能已竊幸它日臣父
敘復而齒於朝則臣尚敢自陳而冀得請所有勅誥臣

已於當日祇受奉表稱謝訖

乞移鄆州劄子

臣輒以忤幅上千聖明進退為憂俯伏待罪伏念臣行能朽薄猥列從官之後國恩過厚夙夜震恐未知所以為報而犬馬之質早衰多病比年尤甚遭遇朝廷大治四方無事臣得以優游養安於外粗了職事未從誅廢不勝大幸再念臣到任已踰二年伏恐例當除替臣竊聞鄆州曹佾到任亦已二年或應召移臣欲望聖慈特

許就差臣知鄆州臣雖罷悴無狀尚可黽勉殫其餘力
以報國恩

上殿劄子

臣伏見朝廷比歲置官遣使自京師達於天下凡征賦
之重力役之衆有所病於民者悉寬除之所以惠養百
姓德澤甚厚臣愚以謂尚有未盡者郡縣或以虛名建
而民力分不能給其一事也蓋一郡雖小必有一郡之
役一縣雖小亦必有一縣之役地非加廣也民非加衆

也昔合而役於一者今乃分而役於二然則欲民力之有餘不可得矣是所謂以虛名而取實弊殆當時議者之過而今天下以軍名者多是也臣愚不足以盡其利害願陛下屬之有司詳議取近世所置軍縣度其小大遠近可省者皆省而并之如其舊不獨以損吏役而舒民力又以汰冗官而節多費庶幾稱朝廷所以愛育百姓之意取進止

開封府乞增屬官劄子

臣伏見開封府所治京師其職事之劇固非天下郡府之比然今郡府之大者其佐皆置通判職事官六人雖郡府之大職事之劇自不能開封什二三而開封之佐乃獨置推判官四人蓋失之從事久矣且行尹事者固當責以大體夫使國家德澤不宣法制不行百姓失業大衆弗治是其咎也若簿書期會之煩笞榜訊驗之細皆當責其佐今則不然一府之事無小大行尹事者常與其佐雜治之索其精神敝其支體朝而視事昏而後

罷僅能給一日之務夫人之材力亦有分矣事物之來則無窮也以有分而應無窮雖賢智或不能盡況如臣等之愚而欲使國家德澤宣流法制張明百姓篤其業大衆無敢犯不可得矣其弊在於為之佐者少而事不分任不專行尹事者不得盡心于所責爾蓋舉其大者必遺其細察於近者必闇於遠理之常也臣願陛下裁擇可增置府推官二員與舊為四員使均治獄訟判官二員使共治諸務若此則事分而任專處心者精為力

者省法理必盡其精紀綱修而無廢行尹事者得壹意而尸所責庶幾有成以靖京邑以觀四方以稱陛下憂勤內外之意取進止

上中書奏記

某守郡無狀無以稱朝廷惠養百姓之急夙夜自訟不知所為維朝廷寬大未加之罪幸甚幸甚所守東南大郡學者甚衆州雖有學而無官學者不知所師某輒有奏乞除試祕書省校書郎孫侔一職事官管勾本州學

侔之為人相府所知不特某言然朝廷嘗已命侔為揚州學官侔固辭恐朝廷疑侔前意而奏難言其私故敢陳之於左右侔向以固辭揚州學官者是時侔兄觀在朝其祿尚足以周其族故侔得以自守而不願仕朝廷亦高之而不奪其守自居於湖安其賤窮未嘗妄與人交况其有取於人也今乃不幸而失其兄侔方自經營以迎其喪於蜀自此其家事衣食嫁娶一出於侔侔既無祿又不能為生則其家饑寒之憂近在朝夕雖欲不

仕不可得矣恭惟某官閣下方為朝廷致天下士而官之如嚮者顏復等召至一試尚得一邑如侔者固非復等所能望劉敞嘗奏言侔是王安石呂公著之流信知言也然則侔豈止一州郡學官而已如朝廷自以有處侔者則非某所知不然則朝廷亦不惜一職事官於侔以慰此州學者之心又侔方窮困當朝廷憂天下不欲一物失其所之時某故敢盡言侔之思維左右留意幸甚幸甚

下上虞縣令教一首

上虞惡民李氏者一邑之害而四方之所共知也自敗
邑令王存以來朝廷士大夫莫不切齒而欲菹醢之然
則居官者不能使伏其辜亦何以為民之上今足下居
縣亦可謂能矣然舉茲以議始末也其覽此而留意且
其家內亂專殺屠牛釀酒用禁物置兵械皆安然而不
怪欲發而致之於法非艱然所以前后不能發之者由
其族大而耳目羽翼布滿於縣庭把持上下長短王存

由之以敗後莫不以為戒故也然存所以為其所敗者
由為州者非其人耳今足下既無王存之失而僕又幸
不至於前人之愾其發李氏之姦而致之法宜在今日
維微維幾乃克有濟足下今日成此僕明日當言於朝
廷且不獨一言而已要當再言三四言必使朝廷知足
下之才而用之乃已耳其無忽

西溪集卷七